

Prečišćeni tekst Zakona o oznakama geografskog porijekla obuhvata sljedeće propise:

1. Zakon o oznakama geografskog porijekla ("Službeni list Crne Gore", br. 048/08 od 11.08.2008),
2. Zakon o izmjenama i dopunama Zakona kojima su propisane novčane kazne za prekršaje ("Službeni list Crne Gore", br. 040/11 od 08.08.2011), u kojima je naznačen njihov dan stupanja na snagu.

## ZAKON

### O OZNAKAMA GEOGRAFSKOG PORIJEKLA

("Službeni list Crne Gore", br. 048/08 od 11.08.2008, 040/11 od 08.08.2011)

#### I. PREDMET I USLOVI ZAŠTITE

##### Predmet zakona

##### Član 1

- (1) Ovim zakonom uređuju se način sticanja, pravna zaštita i ostvarivanje prava u korišćenju oznaka geografskog porijekla.
- (2) Oznake geografskog porijekla su imena porijekla i geografske oznake.

##### Upotreba oznaka geografskog porijekla

##### Član 2

- (1) Oznake geografskog porijekla upotrebljavaju se za obilježavanje prirodnih, poljoprivrednih i industrijskih proizvoda, proizvoda domaće radinosti i usluga.
- (2) Odredbe ovog zakona ne primjenjuju se na proizvode i usluge u dijelu u kojem je sticanje, pravna zaštita i ostvarivanje prava u korišćenju oznake geografskog porijekla uređena posebnim propisom.

##### Ime porijekla

##### Član 3

- (1) Ime porijekla je geografski naziv države, regiona ili lokaliteta koji služi da označi proizvod koji potiče iz te države, regiona ili lokaliteta, čiji su kvalitet i posebna svojstva isključivo ili bitno uslovljena geografskom sredinom, koja obuhvata prirodne i ljudske faktore i čija se proizvodnja, prerada i priprema u cjelini odvijaju na određenom ograničenom području.
- (2) Imenom porijekla može se izuzetno označiti i proizvod kada sirovina za njegovu proizvodnju potiče sa područja koje je šire ili različito od područja prerade, pod uslovom:
  - 1) da je područje proizvodnje sirovina ograničeno;
  - 2) da postoje posebni uslovi za proizvodnju sirovine;
  - 3) da postoji sistem kontrole koji će osigurati ispunjenja posebnih uslova za proizvodnju sirovine.
- (3) Sirovine iz stava 2 ovog člana mogu biti samo žive životinje, meso i mlijeko.

##### Geografska oznaka

##### Član 4

Geografska oznaka je oznaka koja identifikuje određenu robu kao robu porijeklom sa teritorije određene države, regiona ili lokaliteta sa te teritorije, gdje se određeni kvalitet, reputacija ili druge karakteristike robe suštinski mogu pripisati njenom geografskom porijeklu.

##### Tradicionalni i istorijski nazivi

##### Član 5

Oznaku geografskog porijekla čini i naziv koji nije administrativni geografski naziv određene države, regiona ili lokaliteta, koji je dugom upotrebom u prometu postao opštepoznat tradicionalni naziv proizvoda koji potiče sa tog područja, ili je u pitanju istorijski naziv tog područja, ako ispunjava uslove iz čl. 3 i 4 ovog zakona.

##### Homonimni nazivi

## Član 6

Ako su nazivi dva ili više mjesta odakle proizvod potiče identični, ili gotovo identični u pisanom ili izgovorenom obliku (homonimni nazivi), zaštita takvih geografskih naziva biće priznata svim zainteresovanim licima koja ispunjavaju uslove propisane ovim zakonom, na osnovu principa pravednog i ravnopravnog tretiranja proizvođača na tržištu i istinitog obavještanja potrošača, osim kada to može da izazove zabunu u javnosti o tačnom geografskom porijeklu proizvoda.

### Nazivi koji se ne mogu zaštititi

## Član 7

Oznakom geografskog porijekla ne može da se zaštititi naziv:

- 1) koji je protivan javnom poretku ili moralu;
- 2) čiji izgled ili sadržaj može da stvori zabunu kod potrošača u pogledu prirode, porijekla, kvaliteta, načina proizvodnje ili drugih karakteristika proizvoda;
- 3) koji kod potrošača može da stvori zabunu da proizvod potiče sa geografskog područja koje nije stvarno mjesto njegovog porijekla;
- 4) koji je usljed dugotrajne upotrebe postao generičan, odnosno uobičajen naziv za označavanje određenog proizvoda;
- 5) koji nije zaštićen, ili je prestao da bude zaštićen u državi porijekla, ili koji je prestao da se koristi u toj državi;
- 6) geografske oznake bilo koje druge države koja se odnosi na vinarske proizvode, ako je takva oznaka identična uobičajenom nazivu sorte grožđa koja je postojala na teritoriji Crne Gore prije 1. januara 1995. godine.

## II. OPŠTE ODREDBE O POSTUPKU ZAŠTITE

### Zaštita oznaka geografskog porijekla

## Član 8

- (1) Pravna zaštita oznaka geografskog porijekla ostvaruje se u upravnom postupku koji vodi Zavod za intelektualnu svojinu Crne Gore (u daljem tekstu: nadležni organ).
- (2) Odluke u postupku iz stava 1 ovog člana konačne su i protiv njih se može voditi upravni spor.

### Takse i troškovi postupka

## Član 9

- (1) U upravnom postupku pred nadležnim organom plaćaju se takse i naknade troškova postupka, u skladu sa propisima kojima se uređuju administrativne takse i naknade troškova postupka i troškova za pružanje informacionih usluga.
- (2) Naknade za troškove postupka i troškove za pružanje informacionih usluga utvrđuje Vlada Crne Gore (u daljem tekstu: Vlada).

## Registri

## Član 10

- (1) Nadležni organ vodi Registar prijava imena porijekla, Registar prijava geografskih oznaka, Registar prijava za priznanje statusa ovlašćenih korisnika imena porijekla, Registar prijava za priznanje statusa ovlašćenih korisnika geografskih oznaka, Registar imena porijekla, Registar geografskih oznaka, Registar ovlašćenih korisnika imena porijekla i Registar ovlašćenih korisnika geografskih oznaka.
- (2) Registri iz stava 1 ovog člana imaju status javnih knjiga i zainteresovana lica mogu da ih razgledaju u prisustvu službenog lica.
- (3) Spise registrovanih oznaka geografskog porijekla, osim djelova koji uživaju tajnost, zainteresovano lice može da razgleda u prisustvu službenog lica.
- (4) Na pisani zahtjev zainteresovanog lica i uz plaćanje propisane takse, nadležni organ izdaje kopije dokumenata i odgovarajuće potvrde i uvjerenja o činjenicama o kojima vodi službenu evidenciju.

- (5) Sadržinu i način vođenja registara iz stava 1 ovog člana uređuje ministarstvo nadležno za poslove industrijske svojine (u daljem tekstu: Ministarstvo).

## Dostupnost dokumentacije

### Član 11

Nadležni organ je dužan da zainteresovanim licima učini dostupnim svoju dokumentaciju o oznakama geografskog porijekla.

## Međunarodno registrovanje oznake geografskog porijekla

### Član 12

- (1) Ovlašćeni korisnik oznake geografskog porijekla, odnosno podnosilac prijave za priznanje statusa ovlašćenog korisnika oznake geografskog porijekla može da podnese zahtjev za međunarodno registrovanje u skladu sa međunarodnim ugovorom koji obavezuje Crnu Goru.
- (2) Zahtjev za međunarodno registrovanje iz stava 1 ovog člana, uz plaćanje propisane takse, podnosi se preko nadležnog organa.
- (3) Sadržina zahtjeva za međunarodno registrovanje oznake geografskog porijekla i postupanje nadležnog organa po tom zahtjevu uređuje se propisom Ministarstva.

## Zastupanje

### Član 13

- (1) Strano fizičko ili pravno lice u postupku pred nadležnim organom mora zastupati domaći advokat ili zastupnik upisan u Registar zastupnika koji vodi nadležni organ.
- (2) U Registar zastupnika koji vodi nadležni organ upisuju se fizička i pravna lica koja ispunjavaju uslove utvrđene zakonom kojim se uređuju patenti.

## III. POSTUPAK PO PRIJAVI OZNAKE GEOGRAFSKOG PORIJEKLA

### Pokretanje postupka za registrovanje imena porijekla, odnosno geografske oznake

### Član 14

- (1) Postupak za registrovanje imena porijekla, odnosno geografske oznake pokreće se podnošenjem odgovarajuće prijave.
- (2) Prijavu imena porijekla, odnosno geografske oznake mogu da podnesu:
  - 1) udruženja fizičkih i pravnih lica, asocijacije privrednika, udruženja potrošača, državni i organi lokalne samouprave, zainteresovani za zaštitu imena porijekla, odnosno geografske oznake u okviru svojih aktivnosti;
  - 2) strana fizička ili pravna lica, odnosno strana udruženja, ako je ime porijekla, odnosno geografska oznaka priznata u državi porijekla, kada to proizilazi iz međunarodnih ugovora;
  - 3) domaća fizička ili pravna lica koja na određenom geografskom području proizvode proizvode koji se označavaju nazivom tog geografskog područja, pod uslovom da su ispunjeni sljedeći uslovi:
    - da su u vrijeme podnošenja prijave jedini proizvođači ili prerađivači proizvoda ili davatelji usluga, za koje se zahtjeva registrovanje imena porijekla, odnosno geografske oznake;
    - ako geografsko područje ima svojstva koja se znatno razlikuju od svojstava susjednih područja ili su svojstva proizvoda različita od proizvoda iz susjednih područja.
- (3) Prijava imena porijekla, odnosno geografske oznake može da se odnosi samo na jednu oznaku ili ime geografskog područja i samo na jednu vrstu proizvoda.
- (4) Za podnošenje prijave imena porijekla, odnosno geografske oznake plaća se propisana taksa.

## Bitni djelovi prijave

### Član 15

Bitni djelovi prijave imena porijekla, odnosno geografske oznake su:

- 1) zahtjev za registrovanje imena porijekla, odnosno geografske oznake;

- 2) opis geografskog područja;
- 3) podaci o specifičnim karakteristikama proizvoda.

## **Zahtjev za registrovanje imena porijekla, odnosno geografske oznake**

### **Član 16**

- (1) Zahtjev za registrovanje imena porijekla, odnosno geografske oznake sadrži:
  - 1) podatke o podnosiocu prijave;
  - 2) geografski naziv koji se štiti;
  - 3) vrstu proizvoda koji se obilježava određenim geografskim nazivom;
  - 4) geografski naziv područja ili mjesta iz koga potiče proizvod koji se obilježava određenim geografskim nazivom;
  - 5) potpis podnosioca prijave;
  - 6) dokaz o plaćenju propisane takse.
- (2) Ako prijavu podnosi strano fizičko ili pravno lice, odnosno strano udruženje, zahtjev iz stava 1 ovog člana treba da sadrži i javnu ispravu kojom se potvrđuje ime porijekla, odnosno geografska oznaka priznata u državi porijekla.
- (3) Zahtjev za registrovanje imena porijekla, uz elemente iz stava 1 ovog člana, sadrži i naznačenje ovlaštene organizacije koja vrši kontrolu kvaliteta proizvoda.
- (4) Zahtjev za registrovanje geografske oznake, uz elemente iz stava 1 ovog člana, može da sadrži i izgled geografske oznake, ako pored riječi sadrži i eventualne figurativne djelove, ili samo figurativne djelove koji su podobni da identifikuju geografsko porijeklo određene robe.

## **Opis geografskog područja**

### **Član 17**

Opis geografskog područja sadrži podatke o geografskom području sa koga potiče proizvod i obuhvata bliže određenje administrativnih granica tog područja, geografsku mapu tog područja i podatke o geografskim i ljudskim faktorima koji prouzrokuju specifične karakteristike, kvalitet ili reputaciju proizvoda u pitanju.

## **Podaci o specifičnim karakteristikama proizvoda**

### **Član 18**

- (1) Podaci o specifičnim karakteristikama proizvoda, u slučaju prijave geografske oznake, sadrže opis načina proizvodnje proizvoda, precizno naznačenje specifičnih karakteristika ili kvaliteta proizvoda, uključujući i podatke o stečenoj reputaciji, odredbe o tome ko ima pravo na upotrebu geografske oznake i pod kojim uslovima, kao i odredbe o pravima i obavezama korisnika geografske oznake.
- (2) Podaci o specifičnim karakteristikama proizvoda, u slučaju prijave imena porijekla, podnose se u vidu elaborata o načinu proizvodnje proizvoda i posebnim svojstvima i kvalitetu proizvoda, koji naročito sadrži:
  - 1) podatke o podnosiocu prijave imena porijekla i licu ovlaštenom da ga predstavlja;
  - 2) geografski naziv koji se štiti;
  - 3) podatke o ustaljenom načinu i postupku proizvodnje proizvoda;
  - 4) podatke o posebnim svojstvima i kvalitetu proizvoda;
  - 5) dokaz o izvršenoj kontroli kvaliteta proizvoda od strane ovlaštene organizacije;
  - 6) odredbe o načinu obilježavanja proizvoda;
  - 7) odredbe o tome ko i pod kojim uslovima ima pravo da koristi ime porijekla;
  - 8) odredbe o pravima i obavezama korisnika imena porijekla;
  - 9) podatke određene drugim propisima kojima se reguliše kvalitet proizvoda.
- (3) Isprava iz stava 2 tačka 5 ovog člana ne može biti starija od šest mjeseci.

## **Datum podnošenja prijave**

### **Član 19**

- (1) Prijava imena porijekla, odnosno geografske oznake zavodi se u odgovarajući registar prijava iz člana 10 stav 1 ovog zakona samo ako sadrži bitne djelove prijave iz člana 15 ovog zakona.
- (2) Na prijavi imena porijekla, odnosno geografske oznake, podnijetoj neposredno nadležnom organu, koja sadrži djelove iz člana 15 ovog zakona, zabilježiće se broj prijave i dan njenog prijema u nadležnom organu i o tome će se podnosiocu prijave izdati potvrda.
- (3) Ako prijava imena porijekla, odnosno geografske oznake ne sadrži bitne djelove iz člana 15 ovog zakona, nadležni organ će pozvati podnosioca prijave da u roku od 30 dana od dana prijema obavještenja otkloni nedostatke, uz upozorenje da će prijava biti odbačena.
- (4) Ako podnosilac prijave imena porijekla, odnosno geografske oznake u ostavljenom roku otkloni nedostatke, takvoj prijavi priznaće se, posebnim zaključkom, kao datum podnošenja prijave datum prijema u nadležnom organu podneska kojim se nedostaci otklanjaju i prijava će se upisati u odgovarajući registar prijave.
- (5) Ako podnosilac prijave imena porijekla, odnosno geografske oznake u ostavljenom roku ne otkloni nedostatke, nadležni organ će odbaciti prijavu.

### **Redosljed ispitivanja prijave**

#### **Član 20**

Prijave imena porijekla, odnosno geografske oznake ispituju se po redosljedu određenom datumom njihovog podnošenja.

### **Ispitivanje urednosti prijave**

#### **Član 21**

- (1) Prijava imena porijekla, odnosno geografske oznake je uredna ako sadrži sve elemente iz čl. 16 do 18 ovog zakona.
- (2) Ako utvrdi da prijava imena porijekla, odnosno geografske oznake nije uredna, nadležni organ će u pisanoj formi, uz navođenje razloga, pozvati podnosioca prijave da je uredi u roku od 30 dana od dana prijema obavještenja.
- (3) Na obrazloženi zahtjev podnosioca prijave imena porijekla, odnosno geografske oznake, uz plaćanje propisane takse, nadležni organ može da produži rok iz stava 2 ovog člana za vrijeme koje smatra primjerenim, a najduže tri mjeseca.
- (4) Ako podnosilac prijave u ostavljenom roku ne uredi prijavu, ili ne plati taksu za njeno uređivanje, nadležni organ će prijavu odbaciti.
- (5) U slučaju iz stava 4 ovog člana, uz plaćanje propisane takse, podnosilac prijave imena porijekla, odnosno geografske oznake može da podnese predlog za povraćaj u pređašnje stanje, u roku od tri mjeseca od dana prijema zaključka o odbacivanju.

### **Ispitivanje uslova za registrovanje**

#### **Član 22**

- (1) Ako je prijava imena porijekla, odnosno geografske oznake uredna u smislu člana 21 stav 1 ovog zakona, nadležni organ ispituje da li su ispunjeni uslovi propisani ovim zakonom za registrovanje imena porijekla, odnosno geografske oznake.
- (2) U postupku ispitivanja iz stava 1 ovog člana, kada je prijavilac udruženje lica ili domaće lice iz člana 14 stav 2 tač. 1 i 3 ovog zakona, nadležni organ će zatražiti mišljenje organa državne uprave nadležnog za oblast kojoj pripada predmet ispitivanja, koje će uzeti u obzir prilikom odlučivanja o zahtjevu za registrovanje imena porijekla, odnosno geografske oznake.

### **Rješenje o odbijanju registrovanja**

#### **Član 23**

- (1) Ako nadležni organ utvrdi da prijava imena porijekla, odnosno geografske oznake ne ispunjava uslove propisane ovim zakonom za registrovanje imena porijekla, odnosno geografske oznake, nadležni organ će u pisanoj formi obavijestiti podnosioca prijave o razlozima zbog kojih ime porijekla, odnosno geografska oznaka ne može da bude registrovana i pozvaće ga da se u roku od 60 dana od dana prijema obavještenja izjasni o tim razlozima.

- (2) Na obrazloženi zahtjev podnosioca prijave, uz plaćanje propisane takse, nadležni organ može da produži rok iz stava 1 ovog člana za vrijeme koje smatra primjerenim, a najduže za tri mjeseca.
- (3) Nadležni organ će rješenjem odbiti registrovanje imena porijekla, odnosno geografske oznake ako se podnosilac prijave imena porijekla, odnosno geografske oznake ne izjasni o razlozima iz stava 1 ovog člana.

### **Pretvaranje prijave imena porijekla u prijavu geografske oznake i obrnuto**

#### **Član 24**

- (1) Do okončanja postupka, na zahtjev podnosioca prijave imena porijekla ili geografske oznake, uz plaćanje propisane takse, prijava imena porijekla može da se pretvori u prijavu geografske oznake, i obrnuto.
- (2) U postupku ispitivanja ispunjenosti uslova za registrovanje imena porijekla, nadležni organ je dužan da predloži podnosiocu prijave imena porijekla njeno pretvaranje u prijavu geografske oznake, ako nijesu ispunjeni uslovi za registrovanje imena porijekla, ali su ispunjeni uslovi za registrovanje geografske oznake.
- (3) U postupku ispitivanja ispunjenosti uslova za registrovanje geografske oznake, ako uoči da geografska oznaka ispunjava uslove, ili da bi mogla da ispuni uslove da bude registrovana kao ime porijekla, nadležni organ je dužan da predloži podnosiocu prijave geografske oznake njeno pretvaranje u prijavu imena porijekla.
- (4) O pretvaranju prijave nadležni organ donosi poseban zaključak.

### **Rješenje o registrovanju i upis u odgovarajući registar**

#### **Član 25**

- (1) Ako nadležni organ nađe da prijava imena porijekla, odnosno geografske oznake ispunjava uslove za registrovanje imena porijekla, odnosno geografske oznake koji su propisani ovim zakonom, nadležni organ će donijeti rješenje o registrovanju imena porijekla, odnosno geografske oznake od dana podnošenja uredne prijave, i predmetno ime porijekla, odnosno geografsku oznaku, sa propisanim bibliografskim podacima upisati u Registar imena porijekla, odnosno Registar geografskih oznaka.
- (2) Registrovano ime porijekla, odnosno registrovana geografska oznaka objavljuje se u "Službenom listu Crne Gore" i službenom glasilu koje izdaje nadležni organ.

### **Trajanje imena porijekla, odnosno geografske oznake**

#### **Član 26**

Trajanje registrovanog imena porijekla, odnosno registrovane geografske oznake nije ograničeno.

## **IV. POSTUPAK PO PRIJAVI ZA PRIZNANJE STATUSA OVLAŠĆENOG KORISNIKA OZNAKE GEOGRAFSKOG PORIJEKLA**

### **Pokretanje postupka za priznanje statusa ovlašćenog korisnika**

#### **Član 27**

- (1) Postupak za priznanje statusa ovlašćenog korisnika imena porijekla, odnosno geografske oznake pokreće se prijavom za priznanje statusa ovlašćenog korisnika imena porijekla, odnosno geografske oznake.
- (2) Prijavu za priznanje statusa ovlašćenog korisnika imena porijekla, odnosno geografske oznake mogu da podnesu fizička ili pravna lica koja na određenom geografskom području proizvode proizvode koji se označavaju nazivom tog geografskog područja, kao i udruženja tih fizičkih i pravnih lica.
- (3) Za podnošenje prijave za priznanje statusa ovlašćenog korisnika imena porijekla, odnosno geografske oznake, plaća se propisana taksa.

### **Bitni djelovi prijave**

#### **Član 28**

- (1) Bitni djelovi prijave za priznanje statusa ovlašćenog korisnika imena porijekla, odnosno geografske oznake su:
- 1) zahtjev za priznanje statusa ovlašćenog korisnika imena porijekla, odnosno geografske oznake;
  - 2) dokaz o obavljanju određene djelatnosti na određenom geografskom području.
- (2) Bitan dio prijave za priznanje statusa ovlašćenog korisnika imena porijekla je i dokaz o izvršenoj kontroli kvaliteta proizvoda od strane ovlašćene organizacije navedene u prijavi imena porijekla.

## Zahtjev za priznanje statusa ovlaštenog korisnika

### Član 29

- (1) Zahtjev za priznanje statusa ovlaštenog korisnika imena porijekla, odnosno geografske oznake sadrži:
- 1) podatke o podnosiocu prijave;
  - 2) geografski naziv koji se štiti;
  - 3) vrstu proizvoda koji se obilježava određenim geografskim nazivom;
  - 4) naziv područja ili mjesta odakle proizvod potiče;
  - 5) način obilježavanja proizvoda;
  - 6) izgled geografske oznake ili imena porijekla;
  - 7) naznačenje specifičnih karakteristika proizvoda;
  - 8) potpis podnosioca prijave;
  - 9) dokaz o plaćenju propisane taksi.
- (2) Zahtjev za priznanje statusa ovlaštenog korisnika imena porijekla, uz elemente iz stava 1 ovog člana, sadrži i naznačenje ovlaštene organizacije koja vrši kontrolu kvaliteta proizvoda.

## Dokaz o obavljanju određene djelatnosti na određenom području

### Član 30

Dokazom o obavljanju određene djelatnosti, odnosno proizvodnji određenog proizvoda na određenom području smatraće se potvrde i rješenja izdata od nadležnih organa, odnosno druge isprave podobne za dokazivanje relevantnih činjenica.

## Dokaz o izvršenoj kontroli kvaliteta proizvoda

### Član 31

- (1) Dokazom o izvršenoj kontroli kvaliteta proizvoda smatraće se isprava (uvjerenje, sertifikat, potvrda ili izvještaj) o izvršenoj kontroli kvaliteta određenog proizvoda, izdata od ovlaštene organizacije koja je u zahtjevu za registrovanje imena porijekla i zahtjevu za priznanje statusa ovlaštenog korisnika imena porijekla navedena kao organizacija koja vrši kontrolu proizvoda, kojom se potvrđuje da kontrolisani proizvod posjeduje sva ona posebna svojstva i kvalitet koji su navedeni u elaboratu o načinu proizvodnje proizvoda i posebnim svojstvima i kvalitetu proizvoda iz člana 18 stav 2 ovog zakona.
- (2) Isprava iz stava 1 ovog člana važi šest mjeseci.

## Datum podnošenja prijave

### Član 32

- (1) Prijava za priznanje statusa ovlaštenog korisnika imena porijekla, odnosno geografske oznake upisuje se u odgovarajući registar prijava iz člana 10 stav 1 ovog zakona samo ako sadrži bitne djelove iz člana 28 ovog zakona.
- (2) Na urednu prijavu iz stava 1 ovog člana podnijetoj neposredno nadležnom organu, stavlja se broj prijave i dan njenog prijema u nadležnom organu, i o tome se podnosiocu prijave izdaje potvrda.
- (3) Ako prijava za priznanje statusa ovlaštenog korisnika imena porijekla, odnosno geografske oznake ne sadrži djelove iz člana 28 ovog zakona, nadležni organ će pozvati podnosioca predmetne prijave da u roku od 30 dana od dana prijema obavještenja otkloni nedostatke, uz upozorenje da će prijava biti odbačena ukoliko nedostaci ne budu otklonjeni.
- (4) Ako podnosilac prijave za priznanje statusa ovlaštenog korisnika imena porijekla, odnosno geografske oznake u ostavljenom roku otkloni nedostatke, takvoj prijavi priznaće se, posebnim zaključkom, kao datum podnošenja prijave datum prijema u nadležnom organu podneska kojim se nedostaci otklanjaju i prijava će se upisati u odgovarajući registar prijava.
- (5) Ako podnosilac prijave za priznanje statusa ovlaštenog korisnika imena porijekla, odnosno geografske oznake u ostavljenom roku ne otkloni nedostatke, nadležni organ će odbaciti prijavu.

## Redosljed ispitivanja prijave

### Član 33

Prijave za priznanje statusa ovlaštenog korisnika imena porijekla, odnosno geografske oznake ispituju se po redosljedu određenom datumom njihovog podnošenja.

### Ispitivanje urednosti prijave

### Član 34

- (1) Prijava za priznanje statusa ovlaštenog korisnika imena porijekla, odnosno geografske oznake je uredna ako sadrži elemente iz čl. 29 do 31 ovog zakona, dokaz o uplati takse za prijavu i druge propisane podatke.
- (2) Ukoliko prijava iz stava 1 ovog člana nije uredna, nadležni organ će u pisanoj formi, uz navođenje razloga, pozvati podnosioca prijave da je uredi u roku od 30 dana od dana prijema obavještenja.
- (3) Na obrazloženi zahtjev podnosioca prijave za priznanje statusa ovlaštenog korisnika imena porijekla, odnosno geografske oznake, uz plaćanje propisane takse, nadležni organ može da produži rok iz stava 2 ovog člana za vrijeme koje smatra primjerenim, a najduže za tri mjeseca.
- (4) Ako podnosilac prijave u ostavljenom roku ne uredi prijavu, ili ne plati propisanu taksu, nadležni organ će prijavu odbaciti.
- (5) U slučaju iz stava 4 ovog člana, uz plaćanje propisane takse, podnosilac prijave za priznanje statusa ovlaštenog korisnika imena porijekla, odnosno geografske oznake može da podnese predlog za povraćaj u pređašnje stanje, u roku od tri mjeseca od dana prijema zaključka o odbacivanju.

### Ispitivanje uslova za priznanje statusa ovlaštenog korisnika

### Član 35

Ako je prijava za priznanje statusa ovlaštenog korisnika imena porijekla, odnosno geografske oznake uredna u skladu sa čl. 29 do 31 ovog zakona, nadležni organ ispituje da li su ispunjeni uslovi za priznanje statusa ovlaštenog korisnika imena porijekla, odnosno geografske oznake propisani ovim zakonom.

### Rješenje o odbijanju priznanja statusa ovlaštenog korisnika

### Član 36

- (1) Ako nadležni organ utvrdi da prijava za priznanje statusa ovlaštenog korisnika imena porijekla, odnosno geografske oznake ne ispunjava uslove propisane ovim zakonom za priznanje statusa ovlaštenog korisnika imena porijekla, odnosno geografske oznake, nadležni organ će u pisanoj formi obavijestiti podnosioca prijave o razlozima zbog kojih mu se ne može priznati status ovlaštenog korisnika imena porijekla, odnosno geografske oznake i pozvaće ga da se u roku od 60 dana od dana prijema obavještenja izjasni o tim razlozima.
- (2) Na obrazloženi zahtjev podnosioca prijave za priznanje statusa ovlaštenog korisnika imena porijekla, odnosno geografske oznake, uz plaćanje propisane takse, nadležni organ može da produži rok iz stava 1 ovog člana za vrijeme koje smatra primjerenim, a najduže za tri mjeseca.
- (3) Nadležni organ će rješenjem odbiti priznanje statusa ovlaštenog korisnika imena porijekla, odnosno geografske oznake ako se podnosilac prijave ne izjasni o razlozima iz stava 1 ovog člana.

### Pretvaranje prijave za priznanje statusa ovlaštenog korisnika imena porijekla u prijavu za priznanje statusa ovlaštenog korisnika geografske oznake i obrnuto

### Član 37

- (1) Ako je u toku postupka po prijavi za priznanje statusa ovlaštenog korisnika oznake geografskog porijekla, u skladu sa članom 24 ovog zakona, došlo do pretvaranja prijave imena porijekla u prijavu geografske oznake, ili pretvaranja prijave geografske oznake u prijavu imena porijekla, podnosilac prijave za priznanje statusa ovlaštenog korisnika imena porijekla, odnosno geografske oznake čije je pretvaranje izvršeno, dužan je da, uz plaćanje propisane takse, podnese zahtjev za pretvaranje prijave za priznanje statusa ovlaštenog korisnika imena porijekla u prijavu za priznanje statusa ovlaštenog korisnika geografske oznake, ili obrnuto.
- (2) Nadležni organ je dužan da bez odlaganja obavijesti sve podnosiocje prijave za priznanje statusa ovlaštenog korisnika određenog imena porijekla, odnosno geografske oznake, o podnijetom zahtjevu za pretvaranje prijave imena porijekla, odnosno geografske oznake.
- (3) O pretvaranju prijave iz stava 1 ovog člana nadležni organ donosi poseban zaključak.



## Zaključak o plaćanju takse za priznanje statusa ovlaštenog korisnika

### Član 38

- (1) Ako prijava za priznanje statusa ovlaštenog korisnika imena porijekla, odnosno geografske oznake ispunjava uslove koji su propisani ovim zakonom da se podnosiocu prijave prizna status ovlaštenog korisnika imena porijekla, odnosno geografske oznake, nadležni organ će pozvati podnosioca prijave da plati taksu za priznanje statusa ovlaštenog korisnika imena porijekla, odnosno geografske oznake, za prvih pet godina i troškove objave podataka o ovlaštenom korisniku imena porijekla, odnosno geografske oznake i da dostavi dokaze o izvršenim uplatama.
- (2) Ako podnosilac prijave u roku od 30 dana od dana prijema obavještenja ne dostavi dokaze o izvršenim uplatama iz stava 1 ovog člana, prijava će se smatrati povučenom, o čemu se donosi zaključak o odbacivanju prijave.
- (3) U slučaju iz stava 2 ovog člana, podnosilac prijave za priznanje statusa ovlaštenog korisnika imena porijekla, odnosno geografske oznake, može uz plaćanje propisane takse da podnese predlog za povraćaj u pređašnje stanje, u roku od tri mjeseca od dana prijema zaključka o odbacivanju prijave.

## Rješenje o priznanju i upis statusa ovlaštenog korisnika u odgovarajući registar

### Član 39

Kada podnosilac prijave za priznanje statusa ovlaštenog korisnika imena porijekla, odnosno geografske oznake, dostavi dokaze o izvršenim uplatama iz člana 38 stav 1 ovog zakona, nadležni organ donosi rješenje o priznanju statusa ovlaštenog korisnika imena porijekla, odnosno geografske oznake i priznati status podnosioca prijave, sa propisanim bibliografskim podacima, upisuje u Registar ovlašćenih korisnika imena porijekla, odnosno Registar ovlašćenih korisnika geografskih oznaka.

## Izdavanje isprave i objavljivanje podataka o statusu ovlaštenog korisnika

### Član 40

- (1) Ovlaštenom korisniku imena porijekla, odnosno geografske oznake izdaje se isprava o statusu ovlaštenog korisnika imena porijekla, odnosno geografske oznake, a propisani podaci o priznatom statusu objavljuju se u "Službenom listu Crne Gore" i službenom glasilu nadležnog organa.
- (2) Sadržina isprave o statusu ovlaštenog korisnika iz stava 1 ovog člana uređuje se propisom Ministarstva.

## Trajanje statusa ovlaštenog korisnika

### Član 41

- (1) Status ovlaštenog korisnika imena porijekla, odnosno geografske oznake traje pet godina od dana upisa priznatog statusa u Registar ovlašćenih korisnika imena porijekla, odnosno Registar ovlašćenih korisnika geografskih oznaka.
- (2) Status ovlaštenog korisnika imena porijekla, odnosno geografske oznake može, na zahtjev ovlaštenog korisnika, uz podnošenje dokaza o ispunjavanju uslova propisanih ovim zakonom i plaćenju propisane takse, da bude obnovljen neograničen broj puta, sve dok traje odgovarajuće ime porijekla, odnosno geografska oznaka.
- (3) Sadržina zahtjeva iz stava 2 ovog člana uređuje se propisom Ministarstva.

## V. SADRŽINA I OBIM PRAVA OVLAŠĆENOG KORISNIKA OZNAKE GEOGRAFSKOG PORIJEKLA

### Korišćenje registrovanog imena porijekla, odnosno geografske oznake

### Član 42

- (1) Registrovano ime porijekla, odnosno geografsku oznaku mogu da koriste samo lica kojima je priznat status ovlašćenih korisnika tog imena porijekla, odnosno te geografske oznake, i koja su upisana u odgovarajući registar.
- (2) Ovlašćeni korisnici imena porijekla, odnosno geografske oznake imaju pravo da ime porijekla, odnosno geografsku oznaku koriste za obilježavanje proizvoda na koje se ime porijekla, odnosno geografska oznaka odnosi.

- (3) Ovlašćeni korisnici imena porijekla imaju isključivo pravo da svoj proizvod obilježavaju oznakom "kontrolisano ime porijekla".
- (4) Prava iz st. 2 i 3 ovog člana obuhvataju i upotrebu imena porijekla, odnosno geografske oznake na ambalaži, katalogima, prospektima, oglasima, posterima i drugim oblicima ponude, uputstvima, računima, poslovnoj prepisci i drugim oblicima poslovne dokumentacije, kao i uvoz i izvoz proizvoda obilježenih tim imenom porijekla, odnosno tom geografskom oznakom.

### **Nedozvoljene radnje**

#### **Član 43**

Lica koja nemaju status ovlašćenih korisnika imena porijekla, odnosno geografske oznake ne smiju da koriste registrovano ime porijekla, odnosno registrovanu geografsku oznaku, njen prevod, transkripciju ili transliteraciju, ispisanu bilo kojim tipom slova, u bilo kojoj boji, ili izraženu na bilo koji drugi način, za obilježavanje proizvoda i ako se toj geografskoj oznaci, odnosno imenu porijekla dodaju riječi "vrsta", "tip", "način", "imitacija", "po postupku" i slično, čak i ako je navedeno istinito geografsko porijeklo proizvoda.

### **Odnos prema ranije registrovanom žigu**

#### **Član 44**

- (1) Odredbe ovog zakona neće uticati na uslove za registrovanje, valjanost registracije žiga ili prava na korišćenje žiga, koji je identičan, ili sličan registrovanoj geografskoj oznaci, ukoliko je žig u pitanju prijavljen, ili registrovan u dobroj vjeri, ili su prava na žig stečena kroz upotrebu u dobroj vjeri prije podnošenja prijave za priznavanje imena porijekla, odnosno geografske oznake.
- (2) Ne može se registrovati geografska oznaka, odnosno ime porijekla identično ili slično ranije registrovanom žigu, ukoliko bi takvo registrovanje, imajući u vidu reputaciju, poznatost i dužinu upotrebe takvog žiga, moglo da dovede potrošače u zabunu u pogledu stvarnog porijekla i svojstava proizvoda.

### **Upotreba ličnog imena**

#### **Član 45**

Lično ime ili ime prethodnika u poslovanju može se koristiti slobodno ukoliko se ne koristi na način kojim se potrošač može dovesti u zabludu.

### **Zabrana prenosa**

#### **Član 46**

- (1) Registrovano ime porijekla, odnosno registrovana geografska oznaka ne može da bude predmet ugovora o prenosu prava, licenci, zaloge, franšize i sl.
- (2) Ako je registrovano ime porijekla, odnosno registrovana geografska oznaka predmet prijavljenog ili registrovanog žiga, takav žig ne može da se prenosi, ustupa, daje u zalogu i slično.

## **VI. OGLAŠAVANJE NIŠTAVIM RJEŠENJA O REGISTROVANJU**

### **Uslovi za oglašavanje rješenja ništavim**

#### **Član 47**

Na pisani predlog zainteresovanog lica, nadležni organ može da oglasi ništavim rješenje o registrovanju oznake geografskog porijekla, odnosno rješenje o priznanju svojstva ovlašćenog korisnika, ako utvrdi da u vrijeme njegovog donošenja nijesu bili ispunjeni uslovi za registrovanje oznake geografskog porijekla, odnosno za priznanje svojstva ovlašćenog korisnika.

### **Predlog za oglašavanje rješenja ništavim**

#### **Član 48**

- (1) Predlog iz člana 47 ovog zakona podnosi se u dva primjerka i sadrži:
- 1) podatke o podnosiocu predloga;
  - 2) naznačenje da se traži oglašavanje ništavim rješenja o registrovanju oznake geografskog porijekla, odnosno o priznanju statusa ovlašćenog korisnika;

- 3) registarski broj oznake geografskog porijekla za koju se traži oglašavanje rješenja o registrovanju ništavim, odnosno registarski broj oznake geografskog porijekla protiv čijeg ovlašćenog korisnika je podniet predlog;
  - 4) podatke o ovlašćenom korisniku oznake geografskog porijekla za koju se traži oglašavanje rješenja o registrovanju ništavim;
  - 5) razloge zbog kojih se traži oglašavanje rješenja o registrovanju ništavim;
  - 6) dokaze o navedenim razlozima;
  - 7) uredno punomoćje kada se postupak pokreće preko punomoćnika;
  - 8) dokaz o uplati propisane takse za podnošenje predloga.
- (2) Ako predlog za oglašavanje ništavim rješenja o registrovanju oznake geografskog porijekla, odnosno o priznanju statusa ovlašćenog korisnika ne ispunjava propisane uslove iz stava 1 ovog člana, nadležni organ će u pisanoj formi pozvati podnosioca predloga da upotpuni predlog, u roku od 30 dana od dana prijema poziva.
- (3) Ako podnosilac predloga u roku iz stava 2 ovog člana ne upotpuni predlog, nadležni organ će predlog odbaciti.

### **Postupak po urednom predlogu**

#### **Član 49**

- (1) Uredan predlog iz člana 47 ovog zakona nadležni organ će dostaviti protivnoj strani i pozvati je da, u roku od 30 dana od dana prijema poziva, dostavi odgovor.
- (2) U postupku po predlogu iz člana 47 ovog zakona nadležni organ može da održi usmenu raspravu.
- (3) Ako podnosilac predloga za oglašavanje ništavim rješenja o registrovanju oznake geografskog porijekla, odnosno o priznanju statusa ovlašćenog korisnika, u toku postupka odustane od svog predloga, nadležni organ može da nastavi postupak po službenoj dužnosti.
- (4) U postupku po predlogu za oglašavanje ništavim rješenja o registrovanju oznake geografskog porijekla shodno se primjenjuju odredbe čl. 23 i 36 ovog zakona.

#### **Član 50**

- (1) Po sprovedenom postupku po predlogu iz člana 47 ovog zakona, nadležni organ može da donese rješenje o oglašavanju ništavim rješenja o registrovanju oznake geografskog porijekla, odnosno o priznanju statusa ovlašćenog korisnika, ili rješenje o odbijanju predloga.
- (2) U roku od tri mjeseca nakon pravosnažnosti odluke kojom je oglašeno ništavim rješenje o registrovanju oznake geografskog porijekla, odnosno rješenje o statusu ovlašćenog korisnika, nadležni organ će u svom službenom glasilu objaviti podatke iz te odluke.

#### **Član 51**

Oglašavanje ništavim rješenja o registrovanju oznake geografskog porijekla, odnosno o priznanju statusa ovlašćenog korisnika nema dejstvo na sudske odluke u vezi sa utvrđivanjem povrede prava koje su u momentu donošenja tog rješenja bile pravosnažne, pod uslovom da je tužilac, odnosno ovlašćeni korisnik oznake geografskog porijekla bio savjestan.

## **VII. PRESTANAK OZNAKE GEOGRAFSKOG PORIJEKLA**

### **Prestanak imena porijekla, odnosno geografske oznake u državi porijekla**

#### **Član 52**

- (1) Registrovano ime porijekla, odnosno registrovana geografska oznaka prestaje da važi ako joj prestane zaštita u državi njenog porijekla.
- (2) Na zahtjev zainteresovanog lica, uz podnošenje potvrde izdate od strane nadležnog organa države porijekla određenog imena porijekla, odnosno geografske oznake, ili po prijemu obavještenja nadležnog organa države porijekla određenog imena porijekla, odnosno geografske oznake da je tom imenu porijekla, odnosno geografskoj oznaci prestala zaštita u državi porijekla, nadležni organ će donijeti rješenje o prestanku važenja imena porijekla, odnosno geografske oznake.
- (3) Rješenje iz stava 2 ovog člana upisuje se u odgovarajući registar i propisani podaci o prestanku važenja imena porijekla, odnosno geografske oznake objavljuju se u "Službenom listu Crne Gore" i službenom glasilu nadležnog organa.

### **Prestanak geografske oznake na osnovu odluke suda**

### Član 53

- (1) Zainteresovano lice može tužbom pred nadležnim sudom da pokrene postupak za utvrđenje da je određena geografska oznaka postala generičan, odnosno uobičajen naziv za određeni proizvod.
- (2) Registrovana geografska oznaka prestaje da važi na osnovu pravosnažne sudske odluke kojom se utvrđuje da je postala generičan, odnosno uobičajeni naziv za određeni proizvod.
- (3) Registrovana geografska oznaka koja je u svojoj državi porijekla registrovana i zaštićena kao ime porijekla ne može da bude proglašena generičnim, odnosno uobičajenim nazivom za određeni proizvod, sve dok takva zaštita traje u državi porijekla.
- (4) Po prijemu sudske odluke iz stava 2 ovog člana, nadležni organ će odluku upisati u odgovarajući registar i u svom službenom glasilu će objaviti propisane podatke o prestanku važenja geografske oznake.

## VIII. PRESTANAK I UKIDANJE STATUSA OVLAŠĆENOG KORISNIKA

### Prestanak statusa ovlašćenog korisnika

#### Član 54

Status ovlašćenog korisnika imena porijekla, odnosno geografske oznake prestaje i prije isteka roka iz člana 41 stav 1 ovog zakona, ako:

- 1) se ovlašćeni korisnik imena porijekla, odnosno geografske oznake odrekne svog statusa - narednog dana od dana predaje nadležnom organu podneska o odricanju;
- 2) je na osnovu čl. 52 i 53 ovog zakona prestalo ime porijekla, odnosno geografska oznaka, na osnovu odluke nadležnog organa - danom određenim tom odlukom;
- 3) je prestalo pravno lice, odnosno ako je umrlo fizičko lice koje ima status ovlašćenog korisnika - danom prestanka, odnosno smrti, osim ako taj status nije prešao na pravne sljedbenike pravnog lica.

### Ukidanje rješenja o priznanju statusa ovlašćenog korisnika

#### Član 55

- (1) Rješenje o priznanju statusa ovlašćenog korisnika imena porijekla, odnosno geografske oznake, na zahtjev zainteresovanog lica, nadležni organ može da ukine ako utvrdi da su prestali da postoje uslovi za priznanje statusa ovlašćenog korisnika imena porijekla, odnosno geografske oznake, propisani ovim zakonom.
- (2) U postupku po zahtjevu za ukidanje rješenja o priznanju statusa ovlašćenog korisnika imena porijekla, odnosno geografske oznake, ovlašćeni korisnik imena porijekla, odnosno geografske oznake dužan je da dokaže da postoje zakonom propisani uslovi za priznanje statusa ovlašćenog korisnika imena porijekla, odnosno geografske oznake.
- (3) Ako podnosilac zahtjeva za ukidanje rješenja o priznanju statusa ovlašćenog korisnika imena porijekla, odnosno geografske oznake, u toku postupka odustane od zahtjeva, nadležni organ može da nastavi postupak po službenoj dužnosti.
- (4) U postupku po zahtjevu za ukidanje rješenja o priznanju statusa ovlašćenog korisnika imena porijekla, odnosno geografske oznake, shodno se primjenjuju odredbe člana 36 ovog zakona.
- (5) Licu koje je upisano kao ovlašćeni korisnik imena porijekla, odnosno geografske oznake u odgovarajući registar, status ovlašćenog korisnika imena porijekla, odnosno geografske oznake prestaje narednog dana od dana pravosnažnosti rješenja o ukidanju rješenja o priznanju statusa ovlašćenog korisnika imena porijekla, odnosno geografske oznake.

## IX. GRAĐANSKOPRAVNA ZAŠTITA

### Zaštita u slučaju povrede registrovane oznake geografskog porijekla

#### Član 56

- (1) U slučaju povrede registrovanog imena porijekla, odnosno geografske oznake, tužilac može tužbom da zahtijeva:
  - 1) utvrđivanje postojanja povrede imena porijekla, odnosno geografske oznake;
  - 2) zabranu radnji kojima se vrši povreda imena porijekla, odnosno geografske oznake;
  - 3) naknadu štete zbog povrede prava, uključujući i troškove zastupanja;

- 4) objavljivanje presude o trošku tuženog;
  - 5) oduzimanje, odnosno uništenje, bez naknade, proizvoda koji su nastali ili stečeni povredom imena porijekla, odnosno geografske oznake;
  - 6) oduzimanje, odnosno uništenje, bez naknade, materijala i predmeta (pribor, alat) koji su pretežno upotrijebljeni u stvaranju proizvoda kojima je izvršena povreda imena porijekla, odnosno geografske oznake.
- (2) Ako je povreda registrovanog imena porijekla, odnosno geografske oznake učinjena namjerno ili krajnjom nepažnjom, tužilac može da zahtijeva naknadu štete u visini trostrukog iznosa stvarne štete i izmakle dobiti.
- (3) Pri razmatranju zahtjeva iz stava 1 tač. 5 i 6 ovog člana, sud uzima u obzir potrebu za srazmjerom između ozbiljnosti povrede i traženih mjera, kao i interes trećih lica.
- (4) Na pitanja u vezi sa naknadom štete nanijete povredom prava, koja nijesu uređena ovim zakonom, primjenjuju se odgovarajuće odredbe zakona kojim se uređuju obligacioni odnosi.

### **Povreda registrovanog imena porijekla, odnosno geografske oznake**

#### **Član 57**

- (1) Povredom registrovanog imena porijekla, odnosno geografske oznake smatra se svako neovlašćeno korišćenje imena porijekla, odnosno geografske oznake, zaštićene u skladu sa ovim zakonom, od strane bilo kog učesnika u prometu.
- (2) Povredom registrovanog imena porijekla, odnosno geografske oznake smatra se i podražavanje takvog imena porijekla, odnosno geografske oznake.

### **Aktivna legitimacija za tužbu**

#### **Član 58**

- (1) Tužbu zbog povrede registrovanog imena porijekla, odnosno geografske oznake iz člana 56 ovog zakona mogu da podnesu lica iz člana 14 stav 2 ovog zakona, ovlašćeni korisnici imena porijekla, odnosno geografske oznake.
- (2) Ako je pred nadležnim organom ili sudom pokrenut postupak iz čl. 47, 52, 53 i 55 ovog zakona, sud koji postupa po tužbi iz člana 56 ovog zakona dužan je da zastane sa postupkom do konačne odluke nadležnog organa, odnosno suda.

### **Rok zastarjelosti**

#### **Član 59**

Tužba zbog povrede registrovanog imena porijekla, odnosno geografske oznake može se podnijeti u roku od tri godine od dana kada je tužilac saznao za povredu i učinioca, a najkasnije u roku od pet godina od dana kada je povreda prvi put učinjena.

## **X. PRIVREMENE MJERE**

### **Privremena mjera oduzimanja ili isključenja proizvoda iz prometa**

#### **Član 60**

- (1) Na zahtjev tužioca koji učini vjerovatnim da je registrovano ime porijekla, odnosno geografska oznaka povrijeđena, ili da će biti povrijeđena, sud može, do pravosnažnosti presude, odrediti privremenu mjeru:
  - 1) oduzimanja, odnosno isključenja iz prometa proizvoda nastalih ili stečenih povredom registrovanog imena porijekla, odnosno geografske oznake;
  - 2) oduzimanja, odnosno isključenja iz prometa predmeta (pribor, alat) pretežno upotrijebljenih u stvaranju proizvoda kojima se vrši povreda registrovanog imena porijekla, odnosno geografske oznake;
  - 3) zabrane nastavljanja započetih radnji kojima se vrši povreda registrovanog imena porijekla, odnosno geografske oznake.
- (2) Predlog za određivanje privremene mjere može se podnijeti i prije podnošenja tužbe, pod uslovom da se tužba podnese u roku od 30 dana od dana izvršenja rješenja o određivanju privremene mjere.
- (3) Ako postoji opasnost od nastanka nenadoknadive štete ili ako je očigledno da postoji opasnost od uništenja dokaza, sud može odrediti privremenu mjeru bez prethodnog izjašnjenja tuženog, s tim da tuženi o tome mora biti obaviješten bez odlaganja, a najkasnije u roku od pet dana od dana određivanja privremene mjere.

- (4) Sud može naložiti podnosiocu predloga da dostavi dodatne dokaze o izvršenoj povredi registrovanog imena porijekla, odnosno geografske oznake, odnosno o postojanju očigledne opasnosti da će registrovano ime porijekla, odnosno geografska oznaka biti povrijeđena i da naloži polaganje jemstva radi onemogućavanja zloupotrebe.
- (5) Žalba protiv rješenja kojim je sud odredio privremenu mjeru iz stava 1 ovog člana ne odlaže izvršenje rješenja.
- (6) Na pitanja u vezi s određivanjem privremenih mjera, koja nijesu uređena ovim zakonom, primjenjuju se odgovarajuće odredbe zakona kojim se uređuje izvršni postupak.

### Obezbjeđenje dokaza

#### Član 61

- (1) Na zahtjev lica koje učini vjerovatnim da je njegovo pravo povrijeđeno, kao i da postoji opravdana sumnja da će dokazi o tome biti uništeni ili da će ih kasnije biti nemoguće pribaviti, sud može odrediti privremenu mjeru obezbjeđenja dokaza, bez prethodnog obavještenja ili saslušanja lica od kojeg se dokazi prikupljaju.
- (2) Obezbjeđenjem dokaza, u smislu stava 1 ovog člana, smatra se pregled prostorija, knjiga, dokumenata, baza podataka i dr., kao i privremeno oduzimanje stvari, ispitivanje svjedoka i vještaka.
- (3) Licu od koga se dokazi prikupljaju, sudsko rješenje o određivanju privremene mjere obezbjeđenja dokaza biće uručeno u trenutku prikupljanja dokaza, a odsutnom licu, čim to postane moguće.
- (4) Privremena mjera obezbjeđenja dokaza može se tražiti i prije podnošenja tužbe, pod uslovom da se tužba podnese u roku od 30 dana od dana izvršenja rješenja o određivanju privremene mjere.

### Obaveza pružanja informacija

#### Član 62

- (1) Sud može da naloži licu koje je izvršilo povredu registrovanog imena porijekla, odnosno geografske oznake da pruži informacije o trećim licima koja su učestvovala u povredi registrovanog imena porijekla, odnosno geografske oznake i o njihovim distributivnim kanalima.
- (2) Lice iz stava 1 ovog člana koje ne izvrši obavezu pružanja informacija odgovara za štetu koja iz toga proizađe.

## XI. KAZNENE ODREDBE

### Prekršaji

#### Član 63

- (1) Novčanom kaznom od 1.300 eura do 20.000 eura kazniće se za prekršaj pravno lice ako koristi registrovano ime porijekla, odnosno registrovanu oznaku porijekla, njen prevod, transkripciju ili transliteraciju, a nema status ovlašćenog korisnika imena porijekla, odnosno geografske oznake (član 43).
- (2) Za prekršaj iz stava 1 ovog člana kazniće se i odgovorno lice u pravnom licu novčanom kaznom od 60 eura do 1.500 eura.
- (3) Za prekršaj iz stava 1 ovog člana kazniće se preduzetnik novčanom kaznom od 1.300 eura do 6.000 eura.

#### Član 64

- (1) Novčanom kaznom od 1.300 eura do 15.000 eura kazniće se za prekršaj pravno lice ako se bavi zastupanjem u ostvarivanju prava iz ovog zakona, a nije upisano u registar zastupnika koji vodi nadležni organ (član 13).
- (2) Za prekršaj iz stava 1 ovog člana kazniće se fizičko lice i odgovorno lice u pravnom licu novčanom kaznom od 60 eura do 600 eura.
- (3) Za prekršaj iz stava 1 ovog člana kazniće se preduzetnik novčanom kaznom od 1.300 eura do 6.000 eura.

## XII. PRELAZNE I ZAVRŠNE ODREDBE

#### Član 65

Zaštita oznaka geografskog porijekla u skladu sa odredbama člana 33 Sporazuma o stabilizaciji i pridruživanju između Evropskih zajednica i njihovih država članica, s jedne strane, i Republike Crne Gore, s druge strane ("Službeni list Crne Gore" broj 7/07) obezbjeđuje se u postupku i na način propisan ovim zakonom.

#### Član 66

Propisi za sprovođenje ovog zakona donijeće se u roku od tri mjeseca od dana stupanja na snagu ovog zakona.

**Član 67**

Danom početka primjene ovog zakona neće se primjenjivati Zakon o oznakama geografskog porijekla ("Službeni list SCG", broj 20/06).

**Član 68**

Ovaj zakon stupa na snagu osmog dana od dana objavljivanja u "Službenom listu Crne Gore", a primjenjivaće se od 1. septembra 2011. godine.